

Sarkina Bt Mat Saad @ Shaari

From: Unit Komunikasi Korporat
Sent: Tuesday, November 13, 2018 9:27 AM
To: UUM - All Staff; UUM - All Students
Subject: Perbezaan Bahasa Dan Budaya Bukan Halangan Capai Keputusan Cemerlang



Unit Komunikasi Korporat
CORPORATE COMMUNICATION UNIT
Universiti Utara Malaysia

13 NOVEMBER 2018 / 05 RABIULAWAL 1440H
=====

"UUM : UNIVERSITI PENGURUSAN TERKEMUKA"
(THE EMINENT MANAGEMENT UNIVERSITY)

Oleh: Mohd Amir Aizat Sainon
Gambar oleh: Seksyen Fotografi

PERBEZAAN BAHASA DAN BUDAYA BUKAN HALANGAN CAPAI KEPUTUSAN CEMERLANG



UUM ONLINE: Perbezaan bahasa, budaya dan sistem pendidikan di negara ini tidak menjadi halangan buat mahasiswa antarabangsa Abdulrahman Ameen Derhem Mohammed Al-Duais, 25 menggenggam segulung ijazah dengan cemerlang apabila mencatat keputusan purata nilai gred kumulatif (PNGK) 3.92.

Graduan yang berasal dari Yaman itu sebaliknya bijak beradaptasi dengan bahasa dan budaya masyarakat setempat hingga mendapat kepercayaan dan sokongan ramai rakan-rakan dari negara ini.

Abdulrahman berkata, beliau beradaptasi dengan persekitaran masyarakat di negara ini dengan mempelajari bahasa Melayu daripada penduduk tempatan.

"Antara cabaran dihadapi mahasiswa antarabangsa di Malaysia ialah menyesuaikan diri dengan budaya masyarakat tempatan, memahami undang-undang dan membiasakan diri dengan sistem pendidikan negara ini.

"Menyedari akan hal ini, saya belajar bahasa Melayu daripada penduduk tempatan dengan bercampur gaul dengan mereka dan berkunjung ke rumah mereka setiap kali mereka menjemput saya dan melibatkan diri dengan aktiviti-aktiviti yang dianjurkan masyarakat setempat.

"Saya juga mengikuti berita tempatan bagi mengetahui perkembangan semasa," ujarnya.

Di samping gigih mempelajari bahasa Melayu, Abdulrahman turut mempunyai tips belajar tersendiri iaitu berpegang kepada prinsip sentiasa membantu orang lain.

"Lebih banyak anda membantu orang lain, lebih banyak bantuan yang diterima. Tuhan akan sentiasa membantu kita sekiranya kita membantu orang lain yang memerlukan. Saya sentiasa berpegang dengan kata-kata ini dalam kehidupan seharian.

"Selain itu, sikap hormat-menghormati perlu juga ada, lebih-lebih lagi kepada pensyarah. Tunjukkan kepada mereka anda lain daripada rakan sekelas anda, mereka juga manusia, jika mereka sukakan anda sudah tentu mereka akan menyokong anda," ujar mahasiswa Ijazah Sarjana Muda Pentadbiran Perniagaan tersebut yang juga penerima Anugerah Emas Canselor.

Tambah Abdulrahman, beliau juga mengambil pendekatan untuk tidak memaksa diri untuk belajar terus menerus hingga menimbulkan tekanan sebaliknya diseimbangkan dengan aktiviti-aktiviti lain.

"Universiti bukan dibina untuk tujuan akademik semata-mata, banyak kemahiran lain yang boleh diasah dengan menyertai kelab, melakukan aktiviti persatuan dan belajar kemahiran lain yang akan memberi kelebihan kepada anda apabila bergraduasi. Tetapi perlu ingat, untuk mengambil serius apabila perlu menghantar tugas dan hampir dengan peperiksaan," jelasnya yang dinobatkan sebagai Pemimpin Mahasiswa Antarabangsa di Malaysia 2017 pada Majlis Anugerah Tokoh Siswa 2017 baru-baru ini.


Mengulas mengenai anugerah yang diterimanya itu, beliau berkata pencapaian itu sukar diluahkan dengan kata-kata.

"Secara jujur, perasaan ini sukar dijelaskan. Menjadi yang terbaik membuatkan saya berasa sangat bersyukur kepada Allah S.W.T, seterusnya berterima kasih kepada Tan Sri Syed Mokhtar Albukhary yang menaja saya, pihak pengurusan UUM, staf dan pensyarah yang banyak menyokong saya sepanjang empat tahun menuntut di UUM. Saya berasa bangga menjadi lulusan UUM, universiti yang mengiktiraf kerja keras dan pencapaian dari pelajar tempatan dan antarabangsa secara saksama," tambahnya.

Kejayaan itu juga mendorongnya memasang impian membantu seramai mungkin pelajar Yaman untuk mendapatkan peluang pendidikan yang lebih baik.

"Saya merancang untuk menubuhkan sebuah organisasi latihan graduan dan bakat muda di Yaman untuk membantu mereka mempelajari kemahiran penting untuk prestasi yang lebih baik dalam industri.

"Saya juga berharap untuk membangunkan diri saya dari segi pendidikan dan profesional untuk memenuhi syarat untuk melaksanakan projek-projek yang boleh menyumbang kepada masyarakat di Yaman, sama ada di bawah organisasi kerajaan atau bukan kerajaan," kongsinya.



Universiti Utara Malaysia Official Website <http://www.uum.edu.my>

Disclaimer: This e-mail (including any attachments) may contain confidential information. If you are not the intended recipient, you are hereby notified that any review, distribution, printing, copying or use of this e-mail is strictly prohibited. If you have received this e-mail in error, please notify the sender or Universiti Utara Malaysia (UUM) immediately and delete the original message. Opinions, conclusions and other information in this e-mail that do not relate to the official business of UUM and/or its group of companies shall be understood as neither given nor endorsed by UUM and UUM accepts no responsibility for the same. All liability arising from or in connection with computer viruses and/or corrupted e-mails is excluded to the fullest extent permitted by law.